

Die ald Kautsch

Vor e paar Daach hott mich de Schorsch moins oogerufe unn gefroochd: Honnes, kennsde mol bei mich kumme?

Was hosde donn?, habb isch gefroochd.

Doo seeder: Du kennst merr mol helfe, unser ald Kautsch in de Keller ze due.

Also bin isch um Drei beim Schorsch gewese, de Schorsch unn isch hawwe omm Disch gesotze unn e Tass Kaffee gedrunke unn isch habb de Schorsch gefroochd, wie dess iss mett soiner Kautsch.

Die schee Kautsch, die soll enaus uff die Gass ferr de Sperrmüll, hott de Schorsch gesaad, isch deetse joo gern behalle, awwer unser Kinner hawwe gemoond, dess ahle Stick doo kann merr doch nimmi seh unn doo hawwe die uns ferr unser Goldern Hochzeit enn Gutschoi ferr e nei Kautsch geschenkt.

Wie?, frooch isch, eier goldern Hochzeit? Die iss doch schunn vor drei Jahr gewese? De Schorsch hott dinn gegrinst. Vor finf Jahr war die schunn, unn su long hawwe merr den Gutschoi uffgehawwe, der hott joo koon Termin gehabbd. Unn jetz uff oomol soll moie e nei Kautsch kumme unn dessdeweese muss die ald halt fort.

Ja, die schee Kautsch, habb isch gesaad, doo dut merr sich immer schwer, so e gut Stick fort ze gewwe. Hosde donn de Sperrmüll oogerufe, Schorsch?

Isch nitt, seet de Schorsch, dess wars Kättche, isch will die alt joo behalle.

Isch habb die Achsele gezuckt. Unn jetz?

De Schorsch war gons traurisch. Unn doo habb isch gedenkt, dass du mol kumme unn mir helfe dust, die Kautsch in de Partyraum im Keller ze stelle. Waaßde, wrens Kättche noochher hoom kimmt, stieht die unne im Keller unn doo bleibt se aach stieh. Schorsch, saach isch, loss uns de erst emol nooch dere Kautsch gugge.

Isch bin meddem Schorsch in soi Wohnstubb gonge und habb die Kautsch onn ooner Eck e bissi oohewe wolle, awwer die war su schwer, dass isch de Kobb geschiddeld unn gesaad habb: Mir zwaa Alde kenne die nitt in de Keller schaffe, die iss ze schwer. Wadd bis doin Bub unn doin Schwiechersohn heit Owend dehoom sinn, die junge Kerl solle dess mache.

Die stelle se merr awwer uff die Strooß, hott de Schorsch gejommerd.

No kumm Schorsch, saach isch, wenn ihr doch e nei kriecht, isses doch dess beste, die ald Kautsch fortzuschmeiße unn nitt in de Keller ze stelle, dort stieht die erum unn doo setzt sich aach kooner mieh druff, weil wonn habbden ihr ess letzte Mol in eiern Partyraum gefeiert? Wenn ihr enn Gebortsdaach habbt giehder doch in die Wertshaft unn losst eich bediene, donn duderr ess Maul abbutze unn bezahle unn ess Kättche hott koo Arwet in de Kisch mett derr gonse Feierei.

Host joo recht, seet doo de Schorsch, unn die Buwe due isch späder aach oorufe, die kenne heit Owend kumme. Awwer oons due isch heit Middaach noch mache.

No was donn, Schorsch?, frooch isch.

Doo hott de Schorsch iwwers gonse Gesicht gegrinst. Erinnerungge wecke! Isch setz mich noochher meddem Kättche noch emol uff die Kautsch, donn duen mir zwaa Alde Händche halle unn duen droo denke, wies friher gewese iss. Unn doodenooch kann die Kautsch halt fort.

Eiern Honnes